

ESPETXE POLITIKAN «NEURRI ADMINISTRATIBOAK» HARTZEKO EGINIKO ESKAERAREN KONTRA BOZKATU ZUEN PPK

Parlamentuak ez dio erantzun bateraturik eman Ortega Lararen sendiaren eskaerari

Espainiako Barne ministroari, Jose Antonio Ortega Lararen egoerari irtenbidea aurkitzeko, kartzeletan neurri administratiboak hartzeko aldeko jarrera igortzearen alde EA, EAJ, IU eta UA alderdiak agertu ziren atzo Giza eskubide batzordean. PPK kontra bozkatu zuen eta HB eta PSE abstenitu egin ziren.

Karmele Jaio / Gasteiz

DOMITILA DIEZ, Jose Antonio Ortega Lararen emazteak, Legebiltzarkideekin izandako bileran egindako eskaerak jasotzen zituen idatzia bateratzea ez zuten lortu atzo Legebiltzarreko Giza Eskubide batzordeko kideek. Jose Antonio Rubalkaba batzordeko lehendakariak proposatutako idatziak lau puntu jasotzen zituen. Idatziaren laugarren puntua izan zen desadostasun gehien sortu zuena. Bertan esaten da batzordeak bere aldeko jarrera azaltzen diola Espainiako Barne Ministroari Ortega Lararen bahiketari irtenbidea aurkitzeko kartzeletan «neurri administratiboak» hartzearen aurrean.

EA, EAJ, IU eta UA alderdiek bere osotasunean onartu zuten idatzia, eta laugarren puntua onartu zuten alderdi bakarrak izan ziren. PP neurri administratiboei buruzko puntuaren kontra agertu zen eta HB eta PSE abstenitu egin ziren.

Eugenio Danboriena PPKo parlamentarioak azaldu zuen Legebiltzarreko Giza Eskubide batzordeak ezin diola ministroari eskatu «mafioso talde batek egindako txantajearen aurrean amore emateko». Kartzela politika Espainiako Barne ministroaren ardura dela gogoratu zuen. Jaime Mayor Oreja Barne ministroak «beti legearen barruan jokatzen du», esan zuen. Horren adibide gisa esan zuen ez dagoela sententzia bakarria kontrakoa esaten duenik.

Neurri administratiboak hartzearen aldeko eskariaren aurrean ezezko botoa «lasaitasun osoz» aurkeztzen zuela esan zuen Danborienak, «ziur nagoelako legea betetzen ari garela». PPK testu alternatibo bat aurkeztu zuen, zeinetan esaten den batzordeak Ortega Lararen sendiarekin izandako bileran jasotako kezka igortzen diola ministroari. Errefuxatua izan zen testua.



Santi Hernando (HB) eta Jose Antonio Rubalkaba, atzo batzordea bildu aurretik.

JOSEBA OLALDE

Bestalde, PSEko Manuel Huertasek bere taldearen abstentzioa azaldu zuen esanez ez zutela aldeko boturik eman PPK ez zuelako puntua onartu. PSEren iritziz, akordioaren onartzea PPren Gobernuaren esku dago eta PPK

kontra bozkatzaren badu ez dago ezer egiterik.

HBk ere abstentzioa bozkatu zuen laugarren puntuaren aurrean. Arnaldo Otegi, HBko parlamentarioak azaldu zuen ez zutela alde bozkatu testua «gaizki erredaktatuta» zegoelako, «eta eskatu beharko litzaiokeelako ministroari legalidadean duden neurriak hartzeko». HBko bozeramaileak esan zuen batzordean «ausardia politiko falta» dagoela. «Gizartearen nahia beterik, euskal presoak Euskal Herrira ekarrita, Ortega Lararen arazoa konpondurik egongo litzateke».

Eako Jasone Iraragorrik azaldu zuen Barne Ministroa dela «Ortega Lararen egoera konpondu dezakeen bakarra». Iuko Javier Madrazok «PPko Gobernuak Ortega Lararen sendiari bizkarra ematen» diola salatu zuen, eta «legea betetzea besterik» ez zaiela eskatzen gogoratu zuen. UAko Pablo Mosquerak defenditu zuen ez dagoela «Barne ministeritzako politikarik bahituen sofrimendua justifikatzen duenik».

Bestetik, idatziaren lehen hiru puntuei dagokienez, talde guztiak agertu ziren alde HB izan ezik. X

Batzordeak onartutako agiria

Eusko Legebiltzarreko Giza Eskubideen batzordeko kideek maiatzaren 15ean Jose Antonio Ortega Lararen senitartekoei izaniko bileraren ondorioz, espetxe funtzionarioari eta Cosme Delclauxen bahiketari buruzko idatzia kaleratu du batzordeak.

✱ 1- Cosme Delclaux Zubiria eta Jose Antonio Ortega Lara jaunen bahiketaren ardura ETArri soilik dagokio.

✱ 2- Nazio Batuen Era-kundeen Batzar Nagusiak 1948ko abenduaren 10ean kaleratutako 217 A ebazpeneko 3. artikuluan pertsona guztiek bizitzarako, askatasunerako eta segurtasunerako eskubidea dutela dio.

✱ 3- Berririo eskatzen diogu ETArri Cosme Delclaux Zubiria eta Jose Antonio Ortega Lara jaunak aske uzteko, haiek askatasunerako duten eskubidea ezin baita inolako arrazoiengatik urratu.

✱ 4- Jose Antonio jaunaren bahiketa modu egokian konpon dadin Barne Ministerioari espetxeetan neurri administratiboak har ditzan aldeko jarrera eta babesa azaltzen diogu. X

Bihar izango diren ekitaldietan parte hartzeko eskatu dute zenbait politikaririk

■ Bost minutuko geldialdia egingo da bi bahituen askatasuna eskatzeko

Agentziak / Bilbo

BIHAR 500 egun beteko dira ETAk Jose Antonio Ortega Lara Logroñoko espetxeko funtzionarioa bahitu zuenetik. Hori dela eta, hainbat taldek ekitaldi bereziak antolatu dituzte biharko, hala nola bost minutuko geldialdi orokorra Euskal Autonomia Elkarte (EAE) osoan.

Hain zuzen, bi bahituen askatasunaren aldeko ohiko kontzentrazioetan ekitaldi horiekin bat egiteko deia egin zuten atzo zenbait politikaririk. Ramon Jauregi sozialistak, esate baterako, «inportantetzat» jo zuen «euskal herritar guztiek elkartasun ekitaldi handi horretan parte hartzea». PSE-EEko kontseilariaren

aburuz, jarraitu egin behar da bi bahituei elkartasuna adierazten. Horrez gain, Giza Eskubiden batzordearen txostena «desegokia» dela esan zuen, eta Barne Ministerioa ez presionatzeko eta baldintzatzeko eskatu zuen buruzagi sozialistak.

Ramon Jauregi Administrazio Publikoko funtzionarioek Bilbon egin ohi duten kontzentrazioan hartu zuen parte. Harekin batera, Enrique Villar Espainiak EAEn duen ordezkaria eta Carmelo Renobales familiaren bozeramaileak izan ziren.

Bahitutako funtzionarioaren lankideek, berriz, Ortega Lara ez dela «ezeren eta inoren truke txanpona» berretsi zuten atzoko kontzentrazioan. Funtzionarioen

bozeramaileetako batek gogoratu zuen egun asko direla jada bahiketa hasi zenetik. «500. eguna, ordea, beste egun bat gehiago izango da guretzat, eta beti bezala jarraituko dugu, normaltasunez lanean, nahiz eta Ortega modu berezian gogoratu», gaineratu zuen bozeramaileak.

Zarauzko BAK-ek, berriz, manifestazioa antolatu du larunbat arratsalderako bi bahituak aska ditzaten eskatzeko. Manifestazio horri hainbat herritarrek erakutsi diote atxikimendua, besteak beste, Imanol Murua Arregik, Anjel Lertxundik, Andoni Egañak, Joxe Juan Gonzalez Txabarrik, Joseba Arregik, Joseba Zubiak eta Iñaki Eizmendi Bazarri-k. X



Ramon Jauregi, Enrique Villar eta Carmelo Renobales Bilboko kontzentrazioan izan ziren atzo.